

Sanaartorneq pillugu Inatsisartut inatsisaata allangortinneqarnera pillugu Inatsisartut inatsisaat kiisalu Grønlands tekniske Organisationi pillugu Inatsisartut peqqussutaata allangortinneqarnerat

(Sanaartukkani piusuni nukimmik sipaarniarluni aaqquissuussinerit kiisalu nuna tamakkerlugu Illuutit Inissiallu nalunaarsuiffiannik BBR-imik pilersitsinissamut Naalakkersuisunut piginnaatitsisut)

(Ineqarnermut Attaveqaasersuutinullu Naalakkersuisoq)

Saqqummiussissut

(Ineqarnermut Attaveqaasersuutinullu Naalakkersuisoq)

Siullermeerneqarnera

Sanaartorneq pillugu Inatsisartut inatsisaata allangortinneqarnissaanik kiisalu Grønlands tekniske Organisationi pillugu Inatsisartut peqqussutaata allangortinneqarnissaanik siunnersuut, Naalakkersuisut matumuuna saqqummiuppaat.

Siunnersuut marlunnik siunertaqarpoq, ilaatigut sanaartukkanik nalinginnaasumik aserfallat-saaliuineq ilutigalugu sanaartukkat nukimmik atuinerisa annikillisinneqarsinnaasunnigortinneqarnissaat, ilaatigullu sanaartukkanik, inissianik, teknikkikkut atortuutinik il.il. nuna tamakkerlugu nalunaarsuisarnissaq aqutissiuussinnaassallugu.

Illuutillit allangortiterinerinut, nutarterinerinut imaluunniit sanaartukkat ilaannik atortuutinilu taarsersuinerinut atatillugu, nukimmik atuinerup pitsanngorsarneqarnissaanik illuutillit sanaartornermut inatsit naapertorlugu siunnersuutitigut piumaffigineqarsinnaalissapput. Tamanna illuliornermi malittarisassanngortussani nutaani piumasaqaatigineqassaaq, taamaallaallu sanaartukkani nukimmik atuinerimut sunniuteqartussanik nutarterinernut, aserfallatsaaliuinerinut kiisalu sanaartukkap ilaani atortuutinik taarsersuinerimut atuutissalluni. Aningaasaliinerimut sanilliullugu nukimmik atuneq sipaaruteqarnermik aatsaat kinguneqarsinnaappat, nukimmik sipaarniarluni aaqquissuussinerit aatsaat suliarineqartassasut siunertaavoq.

Taassuma saniatigut – aamma pingaaruteqannguatsiartumik – Naalakkersuisut Illuutit Inissiallu Nalunaarsuiffiannik pilersitsinissaannut piginnaatitsisumik, sanaartorneq pillugu inatsisartut inatsisaanni nutaanik aalajangersagaqalissaaq. Illuutinik nalunaarsuisarneq, normulersuisarnerlu pillugit kaajallaasitaq atuuttoq naapertorlugu kommunit ullumikkut illuutinik nalunaarsuisarnerisa, normulersuisarnerisalu ataqatigiissinneqarnissaat qulakkeerumallugu, malittarisassat sanaartornermut inatsimmut ilanngunneqassasut siunnersuutigineqarpoq.

Kommunit nalunaarsuiffimmik ingerlatsissasut siunnersuutigineqarpoq. Taamaalilluni illuutit, sanaartukkat, teknikkikkullu atortuutit il.il. nalunaarsuiffimmut nalunaarutigineqartarnissaat kommunit akisussaaffigissavaat, paasissutissallu nutartertuarnissaat isumagissallugu.

”Inuiaqatigiit digitaliusut - Nuna tamakkerlugu digitaliseeriinermut periusissiaq 2018-2021” naapertorlugu tunngaviusumik paasissutissaasiviup ineriartortinneqarnissaanut Illuutit Inis-siallu Nalunaarsuiffiat ilaavoq. Ullutsinni digitaalimik ingerlatsinitsinni inuiaqatigiinnut qitiu-sumik tunngallutik paasissutissat, soorlu inunnut, suliffeqarfinnut, najukkanut, nunaminertan-ut, sanaartukkanut il.il. tunngaviusumik paasissutissanik nutartikkanik paasissutissartaqarlutik digitalikkut tunngaviusumik paasissutissanik nalunaarsuiffiit, pisortat eqaatsumik ingerlat-sinerinut kiisalu nunami inuussutissarsiutinik, aningaasaqarnikkullu ineriartortitsinermut tun-ngavissiillutik sakkussatut pinngitsoorneqarsinnaanngitsutut Naalakkersuisut isigaat.

Taamatut oqaaseqarlunga siunnersuut Inatsisartuni oqaluuserisassanngorlugu Naalakkersuisut sinnerlugit tunniuppara.